

DE

P I S C E

QVEM OCCIDENS PLEIAS FVGIT:

COMMENTATIO PHILOLOGICO - ASTRONOMICA
EXPLICATIONEM LOCI PRO DIFFICILLIMO HABITI
IN VIRGILII GEORG. IV. 231—235 SISTENS.

QVAM

AMPLISSIMI PHILOSOPHORVM ORDINIS AVCTORITATE
PRO OBTINENDIS

IVRIBVS MAGISTERII LIPSIENSIS

A. D. IX. OCTOBRIIS MDCCCXI.

H. L. Q. C.

PVBLCIE DEFENDET

CAR. BRAND. MOLLWEIDE

PHILOSOPH. DOCT. ET IN VNIVERS. LIPS. ASTRONOM. PROF. DESIGN.
REG. SOCIET. SCIENT. GOETTING. A COMMERCIO LITERAR. ET
SOCIET. NATVRAE SCRVTATOR. HALENSIS SODALIS

RESPONDENTE

AVGVSTO FERDINANDO MUEBIO

PORTENSI.

L I P S I A E

EX OFFICINA KLAVBARTHIA.

THE LIBRARY OF THE

MAY 7-1938

UNIVERSITY OF ILLINOIS

PROOEMIUM.

Continent hae pagellae curas secundas, quas in explicando loco Virgilii, quem titulus nominat, posui, simulque σοφωρέας reddere studui. Primae circa eum meditationes meae diario Illustrissimi Lib. Bar. *de Zach:* Monatl. Corresp. V. Band. S. 416 und folg. insertae sunt. Ansam eas denuo excutiendi dedit Reuer. Sam. Horsley publicato libello singulari, idem argumentum tractante, de quo Goettingenses in diario suo litterario, Göttingische gelehrte Anzeigen 1807. 18. St. retulerunt. In hoc examine plura mihi visus sum deprehendisse, quae ad confirmandam explicationem olim a me propositam facerent; verum ea in vulgus edendi iudicioque eruditorum subiiciendi defuit huc vsque occasio, quam iam nunc nactus sum exoptatissimam. Quum enim, ante quam demandatum munus observatoris et professoris astronomiae in vniuersitate litteraria,

ria,

IV

ria, quae Lipsiae sub auspiciis Augustissimi et Potentissimi Saxoniae Regis floret, rite adire possem, iura magisterii Lipsiensis publica disputatione mihi acquirenda essent, aptissimam ei iudicaui materiem, quae et studiis meis conueniret, nec ab eo litterarum genere esset disiuncta, quod plurimum semper fouisse et ornasse, huius academiae, cui in posterum omnem meam operam dicaui, propria quaedam laus est. Ex integro igitur perlustraui, quae olim in locum Virgilii commentatus sum, eaque retractata iam eruditorum examini exhibeo, quorum adsensum si consecutus fuero, quod non parum laeter, habebo.

§. I.

Tempus recte obseruare, omnium quidem multum sed plurimum agricolarum interest, quippe qui omnia sua opera temporibus sic accommodare debeant, vti nihil sero faciant. Prisci igitur agricolae quum calendarii ad motum solis accurate compositi et quotannis publicati commoditate destituerentur, ad tempestates anni designandas ortibus et occasibus fixarum illustriorum ad solem relatis siue apparitionibus et occultationibus earum e solis annuo cursu pendentibus vsi sunt. Neque in eo rationem iniungere fini, quem sibi propositum habebant, adeo ineptam. Nam ob fixarum motum super polis eclipticae admodum tardum apparentiae illae intra vnus seculi vel adeo duorum spatium eundem prope tenorem seruant, certisque anni diebus sunt adstrictae. Quam ita necessitate coacti agricolae temporum denotandorum ingressi erant viam, eam postea scriptores rei rusticae, medici, historici, potissimum vero poëtae, quibus siderum commemoratio materiam ornatus poëmatum suppeditabat, persecuti sunt. Virgilius inprimis tempora in Georgicorum libris hoc pacto circumscribere amat, vt nota quadam apposita ortus vel occasus speciem, ex qua deinde tempus eliciatur, determinet, id quod in ipso minus mirum est, quum, referente Donato in eius Vita, Neapoli, vbi tunc temporis Graecae florebant litterae, mathematicae omni studio indulserit, cuius quidem studii testes extant versus illi nobilissimi ac notissimi:

*Me vero primum dulces ante omnia Musae,
Quarum sacra fero ingenti percussus amore,
Accipiant; coelique vias et sidera monstrant; reliq.*

GEORG. LIB. II. 475 et seqq.

Ceterum iste poëtis vsitatus temporum significandorum mos nomi-
ni ortuum et occasuum poëticorum, quo apparitiones et occulta-
tiones siderum a sole profectae insiguntur, originem dedit.

§. II.

Inter Georgicorum loca, in quibus ortus aut occasus fide-
rum fit mentio, ille quoque est, quo poëta tempora duo mellis
de fauis excipiendi sequentem in modum designat:

*Ris gravidos cogunt fetus: duo tempora messis;
Taygete simul os terris ostendit honestum
Plias, et Oceani spretos pede repulit amnis:
Aut eadem fidus fugiens ubi piscis aquosi
Tristior hibernas caelo descendit in undas.*

LIB. IV. 231 — 235.

Primam ergo fauorum exemptionem fieri iubet sub exortum Pleia-
dis, secundam circa occasum eiusdem. Quem hîc significat Vir-
gilius occasum, matutinum s. cosmicum esse, ex eo, quod tunc
Pleiadem in hibernas undas descendere praedicat, facile colligitur.
Vnde sponte consequitur, ortum, quem innuit poëta, pariter ma-
tutinum s. heliacum esse, quoniam si de ortu vespertino acciperes,
primae mellationis tempus ad tempus alterius nimium appropin-
quaret atque cum eo fere congrueret, id quod res ipsa non pa-
titur.

§. III.

Sed quo melius, quæ huc usque dicta sunt a nobis, et in posterum dicentur, intelligi queant, necesse videtur, rem paullo altius repetamus, totamque ortuum et occasuum poetarum rationem accuratius aliquanto et fusius exponamus.

Pleias igitur, ut ea utamur, quando soli motu proprio ab occidente versus orientem progredienti in tantum vicina facta est, ut paullo post illius occasum occidat postridie vesperi in regione caeli occidua haud apparitura, occasum vespertinum facere dicitur; post quem prae fulgore solis aliquamdiu plane non conspicitur. Dein vero e solis versus ortum magis progressi radiis emersa tum quum primum mane ante eius exortum in parte caeli ortiva sese ostendit, ortu matutino oriri dicitur. Iam in dies longius a sole recedit, donec tantum digressa sit, ut mox post ipsius occasum oriatur postera vespera ortum haud celebratura. Atque tunc ortu vespertino oriri dicitur, ex quo per aliquod tempus conspicitur quidem, sed neque ortum neque occasum faciens. Nunc rursus soli appropinquat, usque dum in tantum accesserit, ut mane ante eius ortum occidat. Et tunc occasum matutinum facere dicitur; quo celebrato quotidie propius soli admouetur, anno vertente rursus se in eius radios immersura orbemque phaenomenorum, quæ enarrauimus, denuo percursura.

§. IV.

Ortus et occasus modo memorati dicuntur apparentes, iisque opponuntur veri, qui in ipso solis orientis aut occidentis articulo fiunt. Illos solum esse conspicuos, hos mere *ᾤωμενους*, ex notionibus allatis patet. Quatuor igitur sunt species ortus siderum totidemque occasus eorum, quarum loco recentiorum plurimi triplicem tantum ortuum et occasuum differentiam statuunt;

IV

tuunt; et quidem ortum atque occasum matutinum dixere cosmicum, vespertinum autem acronychum. At ortum matutinum visibilem itemque occasum vespertinum apparentem cum Seruio heliacos appellare maluerunt, quos praeunte Segnero congruentius multo ortum primum et occasum postremum dixeris.

§. V.

In temporibus ortuum et occasuum poëticorum stellae aliquius definiendis duplicem rationem adhibere licet, experientiam dico et disciplinam. Sed illa dumtaxat ortus et occasus apparentes speculari, hac, eaque sola veros, nec minus apparentes eruere possumus. Illi formulis non est opus, sed potius acutis oculis; haec, scientiae positus siderum motusque solis innixa, arithmetices ac geometriae ope quaecumque circa ortus et occasus siderum quaeri possunt, patefacit, quam quidem rationem, ubi tempora praeterita spectantur, solam adhibendam esse, per se manifestum est.

§. VI.

Inuestigatio temporis, in quod ortus vel occasus stellae aliquius poëticus super dato horizonte, si quidem super eo contingere queat, incidit, per disciplinam et praecepta instituta, tribus fieri modis potest. Aut enim globo caelesti artificiali, aut planisphaerio, aut calculo conficitur. Primus modus facillimus ac phaenomenis ante oculos ponendis et velut depingendis perquam idoneus est. Quare iis maxime conuenit, qui schematum describendorum vel calculorum subducendorum haud satis gnari vel in iis parum exercitati in rem praesentem tamen venire amant. Huic ipsorum omni laude prosequendo desiderio satisfaciunt institutiones de usu vtriusque globi artificialis, quas inter primo loco mihi laudanda venit illa, quam Cel. Scheibelius, explicationibus et
con-

confectariis postea additis, in vulgus edidit. *) Nonnulli quoque systematum astronomicorum conditores de temporibus ortuum et occasuum poeticorum siderum, globi caelestis ope inueniendis, praecepta dederunt; quorum e numero prae ceteris Segnerus mihi nominandus est, propterea quod quomodo globus ad tempora, quae id, quo globus constructus est, vel antecedunt vel insequuntur, accommodandus sit, commonstrauit, **) quod ipsum et Celeb. Scheibelius praestitit.

§. VII.

Planisphaeriorum, quae et alias astrolabia audiunt, duo genera hîc in censum veniunt, quorum vni oculo in polo mundi australi constituto planum aequatoris, siue cum Ptolemaeo mauis, tropici ~~capricorni~~ pro tabula est, alterum oculo in puncto Nadir dicto statuto horizontis planum tabulam habet. Illud ab astrolabiorum scriptoribus astrolabium particulare, hoc autem horizontale vocatur; quae vero appellationes quum ad rationem vsunque eorum haud satis quadrare videantur, prius, omnibus omnino horizontibus accommodatum, planisphaerium vniversale, posterius vero, ad vnum tantummodo horizontem restrictum, particulare nominabo.

De

*) Vollständiger Unterricht vom Gebrauch der künstlichen Himmels- und Erdkugel, Breslau, 1779. 8. Erläuterungen und Zusätze zu dem vollständigen Unterricht vom Gebrauch der künstlichen Himmels- und Erdkugel, abgefaßt von Ioh. Ephr. Scheibel. Breslau, 1785. 8.

**) Astronomische Vorlesungen, §. 361. u. folg.

De planisphaerii vniuersalis constructione vsuque admodum prolixè egit Clavius in opere singulari, cui titulum Astrolabii praeiixit. In eius lib. III. can. IV. et V. tempora quoque ortuum et occasuum poeticorum stellae alicuius astrolabii ope inuenire docuit. Sed quoniam Clauii ratio nimis perplexa ac proinde non parum taediosa est, solutionis ab illo traditae methodum breuiter adumbrabimus, lectores nostros remittentes ad Clarissimi Kluegelii libellum, in quo projectionis stereographicae proprietates luculente atque eleganter explicuit.

Radio itaque pro arbitrio accepto describatur circulus aequatorem repraesentans, et in eo ducantur duae, quae angulos rectos intercipient, diametri, sectiones planorum aequatoris et vtriusque coluri nec non ipsos coluros referentes. Alterutra earum pro coluro aequinoctiorum assumpta, ut altera colurum solstitiorum exhibeat, per §. 8. libelli Kluegeliani describatur circulus, qui aequatorem in punctis intersectionum ipsius et coluri aequinoctiorum sub mutua aequatoris et eclipticae inclinatione transeat, adeoque eclipticam referat, inueniaturque per §. 9. proiectura poli borei illius. Si iam positio stellae, de cuius ortu vel occasu poetico quaeritur, per ascensionem rectam et declinationem detur, ad locum eius in planisphaerio designandum, nihil opus est, nisi ut per §. 30. ducatur circulus aequatori parallelus, qui circulum diurnum stellae repraesentet, hicque deinde recta ex aequatoris centro, quod vtrumque polum mundi refert, ad punctum eius, ascensionis rectae datae competens, educta, et declinationis circulum exhibente, secetur. Sectionis punctum enim stellae locus proiectus est. Sin autem stellae longitudine et latitudine datis, positus ipsius ad eclipticam relatus sit, inscriptio eius perficitur describendo tum per §. 30. circulum, qui circulum eclipticae parallelum, notae distantiae stellae a polo eclipticae boreo respondentem, exhibeat,

exhibeat, tum per §. 31. circulum, qui proiecturas polorum eclipticae transiens circulum latitudinis stellae referat. Horum quippe circulorum intersectione punctum, stellae vicem gerens, innotescit.

Reliquum est, vt in planisphaerio horizon designetur, qui quidem, ob sphaerae caelestis conuersionem et inde continuo mutatum situm stellarum horizontis respectu, variabilis est. Descripto igitur ad datam poli eleuationem secundum §. 8. circulo, qui horizontem in aliquolibet ipsius situ repraesentet, si e centro aequatoris, interuallo rectae inter illud et centrum proiecturae horizontis interiectae ducatur alius circulus; huius circumducta erit locus centri proiecturae horizontis quemcumque situm tenentis.

Vt inueniantur iam tempora ortuum et occasuum poetico-
rum stellae propositae, quaerenda sunt prius puncta eclipticae, in quibus sol haeret, quando stella oriente vel occidente et ipse oritur aut occidit, et ex iis demum tempora deriuanda. Illi proposito autem modo sequente satisfit.

E loco stellae, tamquam centro, radio proiecturae horizontis fiat arcus circulum postremo descriptum bis transiens et e punctis transitus eodem illo radio ducantur circuli duo horizontem exhibentes in duabus positionibus, quas stella ortum vel occasum faciente habet. Horum namque circulorum et eclipticae intersectiones nota efficient quatuor puncta quaesita, quorum quaedam ad ortum stellae, quaedam ad occasum eius pertineant, ex data positione proiecturae meridiani, vt quae centra aequatoris et proiecturae horizontis traiciat, facile diiudicatur.

VIII

Loca solis praecedenti modo reperta ad ortus et occasus veros spectant. Quodsi ea requirantur, quae ortibus et occasibus apparentibus conueniunt, per §. 30. proiiciendi adhuc sunt circuli horizonti paralleli, in quibus quum sol versatur, non impedit, quo minus stella ortum vel occasum faciens conspiciatur. Eorum enim et eclipticae intersectiones itidem quaesita loca dabunt.

§. VIII.

Solutione problematis de temporibus ortuum et occasuum poëticorum stellae alicuius planisphaerii vniuersalis ope inuestigandis expedita ad solutionem eiusdem problematis planisphaerii particularis subsidio perficiendam vt accedamus, ratio a nobis suscepta postulat. Haec autem solutio, quae praeter poli eleuationem ascensionem rectam et declinationem stellae propositae datas esse requirit, ita instituitur.

Fig. I.
et II.

Radio ZH pro lubitu assumpto e centro Z describitur circulus HORW horizontem referens et ducuntur duae eius sub angulis rectis se decussantes diametri HR, OW, quarum una HR intersectionem planorum horizontis et meridiani nec non proiecturam meridiani ipsam, altera OW autem sectionem communem planorum horizontis et verticalis primarii simulque proiecturam verticalis primarii ipsam exhibeat. Designatis deinde per §. 8. et 9. libelli saepius laudati ad datam poli eleuationem proiecturis aequatoris OQW et poli supra horizontem eleuati P ducitur per §. 30. circulus BSD, proiectura circuli a stella proposita in conuersione mundi descripti, id quod ob notam stellae declinationem praestare in procliui erit.

Vt iam locus, quem sol in ecliptica stella ortuum vel occasuum quemque faciente tenet, inueniatur, describitur per §. 31.
circulus

circulus PSM locum stellae S; quam, P polum mundi boreum referente, Fig. I. in horizonte ortiuo, Fig. II. in horizonte occiduo ponit, transiens et declinationis circulum repraesentans. Ab eius et aequatoris sectione M inde per §. 27. abscinditur versus occidentem arcus aequatoris MF, ascensionem rectam datam metiens, vt obtineatur punctum aequinoctii verni F. Per illud deinde secundum praecepta §. 45. ducitur circulus FG proiecturam aequatoris WQO sub angulo obliquitati eclipticae aequali interfecans et eclipticam exhibens. Huius denique et horizontis interfectione L et G innotescunt loca solis quaesita, quorum illa, quae Fig. I. sistit, ad ortus veros, et L quidem ad matutinum, G vero ad vespertinum, ea autem, quae Fig. II. exhibet, ad occasus veros, L videlicet ad vespertinum, atque G ad matutinum, pertinent.

Sed temporibus ortuum et occasuum apparentium inueniendis per §. 30. proiciuntur insuper circuli horizonti paralleli IVKT, in quibus sol eam depressionem attingit, quam habere debet, vt stella ad eandem cum ipso vel aduersam partem meridiani in horizonte posita conspici queat. Quo facto loca solis ortibus et occasibus visibilibus congruentia illorum circulorum et eclipticae interfectionibus T et Y dantur, quae quorsum referenda sint, ex iis, quae modo attulimus, abunde patet.

§. IX.

Missis iam planisphaeriis, quandoquidem eorum vsum in solvendo problemate de temporibus ortuum et occasuum poëtico-
rum stellae alicuius indagandis pro instituto nostro sat copiose exposuimus, ad problematis praedicti solutionem calculi subsidio pertexendam progredimur.

Methodus solutionis autem duplex est, prout stellae positio aequatoris vel eclipticae respectu datur.

Fig. I. In casu priori, in quo ascensio recta FM et declinatio SM dantur, ad punctum eclipticae L vna cum stella exoriens inueniendum in triangulo sphaerico SOM ad M rectangulo ex noto latere SM et angulo SOM, altitudini aequatoris aequali, quaerendum est latus OM, differentia ascensionalis stellae pro data habitatione. Hac ab ascensione recta FM in casu figurae, quae stellam in hemisphaerio polum eleuatum complectente collocat, ablata, innotescit ascensio obliqua stellae propositae FO. In triangulo FOL igitur dantur anguli FOL et OFL, quorum ille supplementum altitudinis aequatoris HOQ, hic obliquitas eclipticae est, vna cum latere comprehenso FO. Inde inueniuntur latus FL, in casu figurae, ascensionem obliquam FO quadrante minorem referentis, distantia puncti orientis L a puncto aequinoctii verni F, et angulus orientis FLO. Cognito autem puncto oriente habetur absque negotio locus solis ortui vero tam matutino quam vespertino respondens. In triangulis deinde LXT, GVV ad X, Y rectangulis ex angulo orientis $XLT = VGY$ et arcu visionis XT vel YV eruendum est interuallum apparitionis LT vel GV, quod longitudini puncti orientis L additum locum solis T ortui matutino apparenti congruentem, a longitudine vero puncti ex aduerso stellae occidentis G demtum locum solis V ortui vespertino visibili conuenientem praebet.

Fig. II. Prorsus eodem modo inueniuntur loca solis cum occasibus stellae quum veris tum apparentibus coniuncta ex descensione eius obliqua FW, quae in casu stellae versus polum eleuatum declinantis, quem figura exhibet, summa ascensionis rectae FM et differentiae ascensionalis MW est.

Hifce

Hiscæ præfatis haud difficulter constare potest, si eleuatio poli dicatur φ , obliquitas eclipticae ϵ , ascensio recta stellae propositae α , declinatio eiusdem δ , differentia ascensionalis Δ , longitudo puncti eclipticae vna cum stella emergentis L et angulus orientis ϑ , haberi

$$\sin \Delta = \tan \varphi \tan \delta$$

$$\tan L = \frac{\cos \varphi \sin (\alpha - \Delta)}{\cos \epsilon \cos \varphi \cos (\alpha - \Delta) - \sin \epsilon \sin \varphi}$$

$$\cos \vartheta = \cos \epsilon \sin \varphi + \sin \epsilon \cos \varphi \cos (\alpha - \Delta)$$

Ad arcum L ope secundae formulae ex sua tangente perfecte determinandum formulis modo prolatis adiungenda est aequatio

$$\sin \vartheta \sin L = \cos \varphi \sin (\alpha - \Delta)$$

in qua autem affectionem functionis $\sin \vartheta$ respectu signi nosse oportet. Nec enim perpetuo angulus ϑ 180 gradibus minor est, neque semper positius manet seu perinde iacet, vt in figura, cui formulae praecedentes sunt superstructae, sed pro habitationibus zonarum frigidarum interdum negatiuus fit, interdum 180° excedit, semicirculo eclipticae, qui in zona frigida boreali ad austrum, in australi ad boream vergit, infra horizontem cadente. Vt igitur in quolibet casu anguli ϑ species, vtpote non satis functione $\cos \vartheta$ determinata, pernoscat, in subsidium vocanda est declinatio puncti eclipticae culminantis, quae si dicatur w, habemus

$$\begin{aligned} \tan w &= \tan \epsilon \sin (\alpha - \Delta - 90^\circ) \\ &= - \tan \epsilon \cos (\alpha - \Delta) \end{aligned}$$

hinc

$$\begin{aligned} \cos \vartheta &= \frac{\cos \epsilon}{\cos w} \sin (\varphi - w) \\ &= \frac{\cos \epsilon}{\cos w} \cos (90^\circ - \varphi + w) \end{aligned}$$

B 2

atque

atque ϑ erit similis ipsi $90^\circ - \varphi + w$; quum hic arcus et angulus ϑ in triangulo rectangulo, a meridiano, horizonte et ecliptica formato, sibi inuicem opponantur.

In sphaeris extra zonas frigidas minimus anguli ϑ valor est 0, maximus 180° graduum, vti facile deprehenditur: pro illis ergo $\sin \vartheta$ vsquequaque valorem positium habet, atque $\sin L$ et $\sin (\alpha - \Delta)$ eodem signo affectos esse oportet, vt constet aequatio

$$\sin \vartheta \sin L = \cos \varphi \sin (\alpha - \Delta).$$

Eadem affectio functionis $\sin \vartheta$ obtinet pro habitationibus zonae frigidae borealis, quando $\alpha - \Delta$ in altero vel tertio quadrante versatur, pro habitationibus zonae frigidae australis vero, cum $\alpha - \Delta$ in primo vel ultimo quadrante existit.

In his igitur casibus omnibus non necesse est, vt respiciatur ad arcum $90^\circ - \varphi + w$, sed supersederi potest computatione ipsius w . Quo autem computus secundum formulas supra datas commodius institui queat, adsumatur in auxilium angulus ζ eiusmodi, vt fit

$$\cot \zeta = \cot \varphi \cos (\alpha - \Delta) \text{ seu } \tan \zeta = \frac{\tan \varphi}{\cos (\alpha - \Delta)}$$

Quo reperto habetur

$$\tan L = \frac{\cos \zeta}{\cos (\zeta + \varepsilon)} \tan (\alpha - \Delta)$$

$$\cos \vartheta = \frac{\sin (\zeta + \varepsilon)}{\sin \zeta} \sin \varphi$$

$$\tan \vartheta = \frac{\cot (\zeta + \varepsilon)}{\cos L}$$

Longitudo

Longitudo puncti orientis L sic inuenta extemplo notas reddit longitudes, quas sol in ortibus stellae veris habet. Sunt eae nimirum L et $180^\circ + L$, quarum illa locum a sole occupatum stella ortum matutinum faciente, haec autem eundem stella ortu vespertino oriente determinat.

Posito nunc arcu visionis $= \gamma$, et interuallo apparitionis $= a$ erit

$$\sin a = \frac{\sin \gamma}{\sin \vartheta}$$

et longitudo solis in ortu stellae matutino apparenti $= L + a$, in ortu eius vespertino visibili autem $= 180^\circ + L - a$.

Vt longitudo puncti eclipticae cum stella cooccidentis, quam per L' designabimus, et angulus occidentis, quem ϑ' denotet, ex descensione stellae obliqua $\alpha + \Delta$ inueniantur, opus tantummodo est animaduerti, ascensionem obliquam puncti eclipticae eodem momento, quo stella infra horizontem descendit, supra eum emergentis esse $180^\circ + \alpha + \Delta$, et longitudinem eiusdem $180^\circ + L'$. Quodsi ergo in formulis ortui conuenientibus in locum $\tau \omega \nu \alpha - \Delta$, L et ϑ substituantur $180^\circ + \alpha + \Delta$, $180^\circ + L'$ et ϑ' respectiue, obtinebuntur eae, quae in occasum quadrant et ita sese habent

$$\tan L' = \frac{\cos \varphi \sin (\alpha + \Delta)}{\cos \varepsilon \cos \varphi \cos (\alpha + \Delta) + \sin \varepsilon \sin \varphi}$$

$$\cos \vartheta' = \cos \varepsilon \sin \varphi - \sin \varepsilon \cos \varphi \cos (\alpha + \Delta)$$

aequatio autem hisce formulis ad perfectam ipsius L determinationem adiicienda est

$$\sin \vartheta' \sin L' = \cos \varphi \sin (\alpha + \Delta)$$

XIV

Species anguli \mathcal{S}' etiam hîc diiudicari debet ex altitudine puncti eclipticae culminantis. Designata scilicet declinatione puncti illius per w' , erit

$$\begin{aligned}\text{tang } w' &= \text{tang } \varepsilon \sin (\alpha + \Delta - 90^\circ) \\ &= \text{tang } \varepsilon \cos (\alpha + \Delta)\end{aligned}$$

$$\cos \mathcal{S}' = \frac{\cos \varepsilon}{\cos w'} \cos (90^\circ - \varphi + w')$$

atque \mathcal{S}' similis arcui $90^\circ - \varphi + w'$.

In sphaeris zonae torridae et vtriusque temperatae angulus \mathcal{S} terminis 0 et 180° continetur: quare pro illis $\sin \mathcal{S}'$ semper valoris positiui est, eademque affectio functionis $\sin \mathcal{S}'$ locum habet pro habitationibus zonae frigidae borealis, quando $\alpha + \Delta$ in primum aut vltimum quadrantem incidit, pro habitationibus zonae frigidae australis autem, quum $\alpha + \Delta$ in alterum aut tertium quadrantem cadit.

In casibus modo memoratis necesse non est, rationem ipsius w' haberi, sed sufficit angulum \mathcal{S}' per cosinum suum determinare.

Adsumto nunc in subsidium angulo μ huiusmodi, vt sit

$$\text{tang } \mu = \frac{\text{tang } \varphi}{\cos (\alpha + \Delta)}$$

habetur

$$\text{tang } L' = \frac{\cos \mu}{\cos (\mu - \varepsilon)} \text{tang } (\alpha + \Delta)$$

$$\cos \mathcal{S}' = \frac{\sin (\mu - \varepsilon)}{\sin \mu} \sin \varphi.$$

$$\text{tang } \mathcal{S}' = \frac{\cot (\mu - \varepsilon)}{\cos L'}$$

Longitu-

Longitudine puncti occidentis L' hoc pacto inuenta; longitudo solis in occasu vespertino vero stellae propositae est idem ipse arcus L' , in occasu matutino vero eius autem $180^\circ + L'$.

Determinetur porro intervallum occultationis a' ope formulae

$$\sin a' = \frac{\sin \gamma}{\sin \vartheta'}$$

et longitudo solis in occasu stellae vespertino visibili erit $L' - a'$, verum in occasu matutino apparenti $180^\circ + L' + a'$.

§. X.

Monstrato hactenus, quomodo ascensione recta et declinatione stellae alicuius datis tempora ortuum et occasuum poëticorum ipsius inuestiganda sint, transimus nunc ad commonstrandum, qua ratione idem praestari possit, longitudine ac latitudine stellae datis, qui fuit casus posterior in §. praec. memoratus.

Primum itaque in triangulo sphaerico EPS ex datis lateribus ES, EP, quorum illud distantia stellae a polo eclipticae boreo, hoc distantia polorum eclipticae et aequatoris est, atque angulo ab iis comprehenso PES, distantia circuli latitudinis stellae et coluri solstitiorum, quaerantur latus PS, distantia stellae a polo mundi et angulus positionis ESP. Tum in triangulo PSR ad R rectangulo ex latere PS modo reperto et latere PR, eleuatione poli, inueniatur angulus PSR, qui in casu Fig. I. stellam in horizonte ortiuo referentis, angulo positionis ESP auctus, in casu Fig. II. autem stellam in horizonte occiduo exhibentis, eodem diminutus angulum ESR a circulo latitudinis et horizonte comprehensum praebet. In triangulo denique LSN ad N rectangulo ex latere SN, latitudine stellae, et angulo LSN = ESR quaeratur angulus orientis vel occidentis

Fig. I.
et II.

XVI

cidentis SLN et latus LN, differentia longitudinum stellae et puncti orientis vel occidentis, qua cognita et ipsa longitudo puncti orientis et occidentis innotescit.

Solutio modo indicata, vocatis longitudine stellae λ , latitudine β , angulo positionis σ , et seruatis, quibus huc vsque vfi sumus, denominationibus, formulis comprehenditur iamiam in medium proferendis.

Inueniatur arcus auxiliaris u eiusmodi, vt fit

$$\text{tang } u = \text{tang } e \sin \lambda$$

et erit

$$\sin \delta = \frac{\sin (\beta + u)}{\cos u} \cos e$$

$$\cot \sigma = \frac{\cos (\beta + u)}{\sin u} \text{tang } \lambda$$

$$\cos \sigma = \cot (\beta + u) \text{tang } \delta$$

quibus formulis aequatio

$$\cos \delta \sin \sigma = \sin e \cos \lambda$$

subiungenda est, vtpote quae arguit, in signis descendantibus angulum positionis fieri negatiuum siue contra cadere, ac in ascendentibus.

Denotatis nunc angulo, qui ab horizonte et declinationis circulo comprehenditur, per χ , arcubus vero, quibus longitudo stellae a longitudinibus puncti orientis et occidentis differt per d et d' , habetur

$$\sin \chi = \frac{\sin \varphi}{\cos \delta}$$

tang

$$\text{tang } d = \sin \beta \text{ tang } (\chi + \sigma)$$

$$\cos \vartheta = \cos \beta \sin (\chi + \sigma)$$

$$\text{tang } \vartheta = \frac{\text{tang } \beta}{\sin d}$$

$$L = \lambda - d$$

$$\text{tang } d' = \sin \beta \text{ tang } (\chi - \sigma)$$

$$\cos \vartheta' = \cos \beta \sin (\chi - \sigma)$$

$$\text{tang } \vartheta' = \frac{\text{tang } \beta}{\sin d'}$$

$$L' = \lambda + d'.$$

Quum vterque angulorum ϑ et ϑ' in sphaeris zonae temperatae borealis intra limites 0 et 90°, in sphaeris zonae temperatae australis autem intra limites 180 et 90° contineatur, patet arcus d et d' posituios aut negatiuos esse, prout pro illis latitudo β borealis aut australis, pro his australis aut borealis fuerit. Vnde colligitur, generatim in sphaeris zonarum temperatarum stellam, quae latitudinem habet polo eclipticae eleuato cognominem, oriri cum eclipticae puncto antecedente, occidere cum sequente: quae vero oppositam, oriri cum puncto sequente, occidere cum antecedente. Haec regula tamen minime vniuersalis est, neque ad sphaeras zonae torridae vel alterutrius frigidae extendi debet, in quibus stella aliquando cum puncto eclipticae antecedente, aliquando cum sequente, et oritur et occidit.

§. XI.

Posiunt varia adhuc circa ortus occasusque stellarum excogitari problemata, sed eorum explicatio ad institutum nostrum non pertinet, ex quo ea tantum attingenda erant, quibus in sequenti-

XVI

cidentis SLN et latus LN, differentia longitudinum stellae et puncti orientis vel occidentis, qua cognita et ipsa longitudo puncti orientis et occidentis innotescit.

Solutio modo indicata, vocatis longitudine stellae λ , latitudine β , angulo positionis σ , et seruat, quibus huc vsque vsi sumus, denominationibus, formulis comprehenditur iamiam in medium proferendis.

Inueniatur arcus auxiliaris u eiusmodi, vt sit

$$\text{tang } u = \text{tang } e \sin \lambda$$

et erit

$$\sin \delta = \frac{\sin (\beta + u)}{\cos u} \cos e$$

$$\cot \sigma = \frac{\cos (\beta + u)}{\sin u} \text{tang } \lambda$$

$$\cos \sigma = \cot (\beta + u) \text{tang } \delta$$

quibus formulis aequatio

$$\cos \delta \sin \sigma = \sin e \cos \lambda$$

subiungenda est, vtpote quae arguit, in signis descendentibus angulum positionis fieri negatiuum siue contra cadere, ac in ascendentibus.

Denotatis nunc angulo, qui ab horizonte et declinationis circulo comprehenditur, per χ , arcubus vero, quibus longitudo stellae a longitudinibus puncti orientis et occidentis differt per d et d' , habetur

$$\sin \chi = \frac{\sin \varphi}{\cos \delta}$$

tang

$$\text{tang } d = \sin \beta \text{ tang } (\chi + \sigma)$$

$$\cos \vartheta = \cos \beta \sin (\chi + \sigma)$$

$$\text{tang } \vartheta = \frac{\text{tang } \beta}{\sin d}$$

$$L = \lambda - d$$

$$\text{tang } d' = \sin \beta \text{ tang } (\chi - \sigma)$$

$$\cos \vartheta' = \cos \beta \sin (\chi - \sigma)$$

$$\text{tang } \vartheta' = \frac{\text{tang } \beta}{\sin d'}$$

$$L' = \lambda + d'$$

Quum vterque angulorum ϑ et ϑ' in sphaeris zonae temperatae borealis intra limites 0 et 90°, in sphaeris zonae temperatae australis autem intra limites 180 et 90° contineatur, patet arcus d et d' posituios aut negatiuos esse, prout pro illis latitudo β borealis aut australis, pro his australis aut borealis fuerit. Vnde colligitur, generatim in sphaeris zonarum temperatarum stellam, quae latitudinem habet polo eclipticae eleuato cognominem, oriri cum eclipticae puncto antecedente, occidere cum sequente: quae vero oppositam, oriri cum puncto sequente, occidere cum antecedente. Haec regula tamen minime vniuersalis est, neque ad sphaeras zonae torridae vel alterutrius frigidae extendi debet, in quibus stella aliquando cum puncto eclipticae antecedente, aliquando cum sequente, et oritur et occidit.

§. XI.

Posiunt varia adhuc circa ortus occasusque stellarum excogitari problemata, sed eorum explicatio ad institutum nostrum non pertinet, ex quo ea tantum attingenda erant, quibus in sequenti-

bus lemmatum vice vti possemus. Redimus ergo, vnde exor-
si fumus, ad locum Virgilii §. II. laudatum et a nobis iam, vti
inscriptio huius libelli promittit, explicandum.

Quaeritur nimirum, quodnam sit illud sidus, quod Pleias oc-
cidens fugere, et qualis sit ratio, ob quam id fugere, dicatur.

Priusquam ad hanc quaestionem dissoluendam accedamus, ne-
cesse est, vt inuestigetur vis, quae subiecta sit huic phrasi, qua
sidus aliquod aliud fugere dicitur. Eo fine animaduertendum est,
poëtas veteres de duobus sideribus, quorum vnum occidit exorien-
te altero saepius perinde loqui, ac si huius exortus sit fons et cau-
sa occasus illius. Sic Aratus de Virgine canit:

Οὐ μὲν θῆν ὀλίγους γαίης ὑπὸ νεῖατα βάλλει
Παρθένος ἀντέλλουσα. Δύρη τότε κυλληναίῃ
καὶ Δελφίς δύνουσι, καὶ εὐποίητος Ὀϊσός.

PHAENOM. 596—98.

Quem locum Hyginus (Astronom. Lib. IV. c. 12.) ita expressit:
*Virgo autem exorians non pauca sidera obscurat. Nam statim lyra occi-
dit cum sagitta et delphino. Rursum Hyginus de Capricorno haec
habet: Capricornus exorians haec sidera ad terram premere videtur, reli-
quam figuram navis et signum, quod Protigon vocatur; quae apud Ara-
tum sic sonant:*

Αὐτὴ δ' (ἡ Ἀργώ) Αἰγχερεῖι κατέρεχεται ἀντέλλοντι.
Ἡμὸς καὶ Προκύων δύεται.

PHAENOM. 689. 90.

Spectato itaque semel occasu sideris alicuius tanquam si pro-
ficisceretur ab alio sidere exoriente, quae potius fingi potuit causa
disparitionis astri occidentis, quam metus vel terror ab oriente
iniectus,

iniectus, adeo vt hoc illud fugare et vicissim illud hoc fugere videretur. Habebat autem ea fictio potissime et iure aliquo locum, si ex mythologia ratio metus terrorisue reddi poterat, id quod in Scorpione Orionem de caelo fugante obtinet: quamobrem Aratus de eo dicit:

Ὅς καὶ ἐπερχόμενος φοβέει μέγαν Ὠρίωνα.

PHAEN. 636.

narrataque historia de morte Orioni a Scorpione, quem ei violata Diana immiserat, illata addit:

Τοῦνεκα δὴ καὶ Φασὶ περαιόθεν ἐρχομένοιῳ
Σκορπίου Ὠρίωνα περὶ χθονὸς ἔσχατα Φεύγειν.

Ibid. 645. 46.

At etiamfi eiusmodi ratio ex mythologia desumpta adferri non poterat aut tantum supprimebatur, repraesentabatur tamen occasus fideris alicuius ceu fuga ab alio astro exoriente concita, vti in Arati loco, qui modo laudatum statim excipit:

Οὐδὲ μὲν Ἀνδρομέδης καὶ Κήτεος ἔσσ' ἐλέειπτο
Κείνου δ' ἀντέλλοντος, ἀπενθήες, ἀλλ' ἄρα καὶ τοι
Πανσυδίῃ Φεύγουσιν.

vbi sola pauoris a Scorpione, vtpote animali horrendo, excitati idea satis causae est ad dicendum, reliquias Andromedae et Ceti exorientem Nepam fugere.

Sidus ergo, quod infra horizontem descendit, quando aliud supra eum emergit, more Arateo, hoc fugere dici potest, isque ortus et occasus sine respectu ad solem intelligitur. Virgilius vero hanc loquendi formulam traduxit ad ortus et occasus poëticos, adeo vt sidus, quod diluculo primum aut crepusculo vltimum oc-

casum facit, aliud; quod mane primum vel vesperi nouissimum ortum celebrat, fugere praedicaret.

Pro argumento est locus ille:

*Vere fabis satio: tum te quoque, Medica, putres
Accipiunt sulci et milio venit annua cura,
Candidus auratis aperit quum cornibus annum
Taurus, et aduerso cedens Canis occidit astro.*

GEORG. I. 215 — 218.

vbi Canis occasum vespertinum faciens Tauro ortu matutino exorienti cedere siue, quod eodem recidit, ipsum fugere dicitur.

Explorato sensu, vt ita dicam, astronomico tribuendo formulæ de sidere fugiente aliud, quaestionem supra expositam adgredi iam licet.

Atque illico quidem manifestum est, sidus Piscis, quod Pleias occidens fugere dici possit, ita in caelo collocatum esse oportere, vt alteruter ortuum eius specialium s. annuorum, quum ortus generalis s. diurnus hinc excludatur, super horizonte Romano aevo Iuliano circa idem fere anni tempus contingeret, quo occasus matutinus Pleiadis eueniebat. Tum vero aequè perspicuum est, sidus illud ex eorum numero esse debere, quæ aliquam apud veteres in describendis temporibus significandisque tempestatibus nobilitatem nacta sunt.

Hisce requisitis nullum sidus piscis nomine insignitum magis respondere inuenitur, quam Piscis notius a Seruio iam hîc repertus. Primum enim ortus eius vespertinus super horizonte Romano aevo Iuliano praecedebat occasum matutinum Pleiadis spatio temporis haud admodum longo et ei fere aequali, quod inter apparentias Tauri et Canis loco proxime citato memoratas intercedebat, adeo vt Pleias matutine occidens Piscem notium vespertino ortu orientem fugere ex Virgilii ratione recte dici

dici queat. Deinde Piscis notius est inter illa sidera, quorum ortus occasusue ad Solem relati veteribus aëris mutationem significabant, vti ex Ptolemaei libro *) de apparentiis stellarum inerrantium patet, in quo ortus et occasus lucidae Piscis notii cum significato eorum secundum Hipparchum, Caesarem, et alios diligenter notati sunt.

Quantumvis egregie haec conspirent ad persuadendum, Virgilum; quum Pleiada Piscem fugere caneret, Piscem notium in mente habuisse eundemque intelligi voluisse, attamen dubium suboriri possit, num Piscis simpliciter de Pisce notio dici queat. Verum enim vero quum Piscis notius solitarius quasi et plane seiunctus sit a geminis istis in zodiaco positus, ille omnino intelligendus est, vbi de pisce, tamquam astro, singulari numero tantum fit mentio, nisi adiuncta aliud suadeant, id quod obtinet in Ovidii loco:

— — Quotiesque repellit

Ver hiemem, Piscique Aries succedit aquoso.

Met. X. 165.

qui vt de alterutro pisce in zodiaco collocato explicetur, commemoratio Arietis, qui et ipse in zodiaco constitutus est, ceu sideris Pesci succedentis adeoque proximi facit. Huc accedit, quod Aratus simili modo vocabulo Ἰχθύς de Pisce notio vsus est, Virgilioque forsitan praeiuit, dum, *Cancro exoriente*, inquit:

Δύει μὲν Στέφανος, δύει δὲ κατὰ ῥάχιν Ἰχθύς.

Phaen. 572.

quem

Manetho II. 140. En
Calasius. r. 38. Ἰχθύς.
icor. 5 μέγας + αὐτός
Ἰχθύς.

*) Editio a Petauo in Vranologio. Introductionem Ptolemaei et varias lectiones e codice Sautiliano descriptas publicavit Fabricius in Biblioth. Graec. Lib. IV. Hamburgi MDCCVIII.

quem locum Cicero sic transtulit:

*Iam simul ut supero se totum lumine Cancer
Extulit, extemplo cedit delapsa Corona,
Et loca conuiscit cauda tenus infera Piscis.*

et quem de Pisce notio exponere ratio ab Arato in describendo siderum ortu et occasu inita, modusque occidendi ipse vers. 575 et 76 depictus iubent. Quocirca ab Hygino *Cancer exoriens dimidiam partem Coronae Pisfricisque caudam* *) et notium *Pisces* obscurare traditur.

Restat difficultas adhuc tollenda in adiecto epitheto *aquosi*. Sed si accipiatur pro imbrifero, aquas denuntiante, id quod vsui dicendi conuenit, admodum eximie in *Pisces* notium quadrat.

Nam in Ptolemaei libro supra laudato ortus lucidae *Piscis* notii tam vespertinus hîc postulatus, **) quam matutinus ***) occurrit cum significato pluuiæ et stillantis imbris, adeo ut iste *piscis* iure meritoque a Virgilio pluuiam denuntians praedicari potuerit. Haec *Piscis* notio adtributa proprietas, in ortu suo imbres ciendi, est quoque causa, cur poëta *Pleiada* istud sidus vitantem repraesentauerit. Etenim quum ipsa munere perfungeretur ortu suo primam aëstatis partem, amoenissimum anni tempus, annunciandi et quasi adducendi, *Pisces* notium, qui hiemis et coeli pluuii

*) Errauit Hyginus circa caudam *Pisfricis* aut locus corruptus est.

**) Is in parallelo horarum XV i. e. sub eleuatione poli 40° 56' secundum Ptolemaeum die XIX mensis Thoth, cui in Calendario Romano respondet XVI Cal. Octob., eueniebat.

***) Vid. quae ad diem XVIII mensis Pharmuthi i. e. Id. April. et ad diem IX mensis Pachon i. e. IV Non. Mai. adnotata sunt.

pluuii tristis nuncius existerat; non potuit non auersari: quare in ortu eius sese recipiebat, tristiorque ipsa in hibernas vndas descendebat.

§. XII.

Nihil iam restat, quod ad confirmandam explicationem loci Virgiliani, quam huc vsque tradidimus, adhuc addi possit, quam indicium temporum, quibus apparentiae in praecedentibus memoratae super horizonte Romano i. e. sub eleuatione poli $41^{\circ} 54'$ primo anno Iuliano, ad quem sine dubio Caesaris constructum erat parapegma, contingebant. In iis autem computo eruendis hoc modo versatus sum. Longitudines stellarum e catalogo Mayeriano praecessione aequinoctiorum annua $50''$, et in subsidium adsumpta deduxi, latitudines earum vero e Ptolemaei catalogo desumere, quam e recentiori aliquo, correctione ob mutatam eclipticae obliquitatem adhibita, deriuare malui. Obliquitatem denique eclipticae primo anno Iuliano conuenientem ex Clariss. de La Lande ratione statui $= 23^{\circ} 43'$. Sic sequentes obtinui valores quantitatum supra designatarum:

Pro lucida Pleiadum.	Pro Cane maiori.	Pro lucida Piscis notii.
$\lambda = 31^{\circ} 32'$	$= 75^{\circ} 40'$	$= 305^{\circ} 23'$
$\beta = 3 \ 40 \text{ B}^*)$	$= 39 \ 10 \text{ A}$	$= 23 \ 0 \text{ A}$
$\delta = 15 \ 34 \text{ B}$	$= 16 \ 2 \text{ A}$	$= 41 \ 16 \text{ A}$
$\sigma = 20 \ 51$	$= 5 \ 57$	$= 18 \ 3$
$\chi = 43 \ 54$	$= 44 \ 1$	$= 62 \ 41$

Ex

*) Huius magnitudinis latitudo lucidae Pleiadum esse colligitur ex lib. VII. cap. 3. *μεγάλη συντάξις*. quamquam nec ibi nec in catalogo fixarum signum partium gradus recte se habere videtur.

XXIV

Ex hisce valoribus ortui et occasui communibus deriuantur sequentes determinationes:

Pro ortu lucidae Pleiadum.	Pro ortu lucidae Piscis notii.	Pro occasu lucidae Pleiadum.	Pro occasu Canis maioris.
d = 7° 43'	= — 67° 20'	d' = 1° 33'	= — 26° 19'
L = 23 49	= 12 43	L' = 33 5	= 49 21
S = 25 30	= 24 42	S' = 67 0	= 61 27.

Statuto nunc arcu visionis pro stellis primae magnitudinis, quando ad easdem partes meridiani cum Sole constitutae sunt, = 12°, pro stellis tertiae magnitudinis autem sub eadem conditione = 14°, inuenitur pro Cane a' = 13° 42', pro lucida Pleiadum vero a = 34° 12'. Hinc locus solis in occasu Canis vespertino apparenti incidit in 5° 39' 8", in ortu lucidae Pleiadum matutino visibili in 28° 1' 8". Illum occupabat sol III. Cal. Mai. hunc XI. Cal. Iun. Prior determinatio prope congruit cum illa, quam Ptolemaeus in libro antea laudato exhibet. Namque secundum ipsum Canis in parallelo horarum XV i. e. sub eleuatione poli 40° 56', a qua altitudo poli Romae haud multum distat, die III mensis Pachon i. e. IV Cal. Mai. absconditur. Posterior determinatio comparisonem non inuenit, quia Ptolemaeus Pleiadum apparentias neglexit.

Ex tabella praecedenti deriuantur porro absque negotio tempora ortus vespertini veri lucidae Piscis notii nec non occasus matutini veri lucidae Pleiadum. Ille scilicet eueniebat Sole in 12° 43' \pm existente, hic eodem versante in 3° 5' m; quibus locis respondent VIII Id. Octobr. et IV Cal. Nouembr. Dies postremo nominatus proxime accedit ad illum, qui a Varrone et Columella occasui matutino Pleiadum adtribuitur, et quem Virgilium etiam respexisse probabile est, V Cal. Nouemb. puta.

Quodsi

— Quodsi iam ponamus, eum pariter de vero ortu Piscis notii cogitasse, cuius tempus ex tempore ortus visibilis facile coniici potuit, idem fere temporis intervallum inter apparentias Pleiadis et Piscis notii ac inter *Φάσγ* Tauri et Canis interponitur. Verum nec differentia euadit magni momenti, si poëta ortum vespertinum apparentem in mente habuisse dicatur. Nam statuendo arcum visionis pro stellis primae magnitudinis, quum soli ex aduerso positae sunt, $= 8^{\circ}$, reperitur pro lucida Piscis notii $a = 19^{\circ} 27'$; proinde ortus eius vespertinus visibilis eueniebat sole in $23^{\circ} 16'$ *mp* haerente i. e. XV Cal. Octobr. s. die XXI mensis Thoth: quae determinatio paullum recedit a ratione Ptolemaei, eidem ortui in parallelo horarum XV diem XIX mensis Thoth assignantis.

Vtracumque tandem sententia de ortu Piscis notii palmam tulerit, illud tamen certum est, Piscem notium Romae, die quo occasus matutinus Pleiadum fiebat, vesperi supra horizontem ortuum haud multo eleuatum sese ostendisse, id quod ad dicendum, Pleiadem ab ipso fugari, sufficit.

COROLLARIA.

Demonstratio, qua Kaestnerus (Elem. geometr. prop. 59) et post illum nonnulli vel recentissimorum scriptorum prop. 28 Lib. XI. Elem. munierunt, ad parallelepipeda rectangula tantum accommodata ideoque incompleta est.

Fieri potest, vt cubus ita perforetur, vt alius ipsi aequalis per foramen transeat. Sed perforatio ad Wallisii regulam (Opp. Tom. II. p. 659.) instituta successu destituitur.

Qui proportionum doctrinam e geometria proscribunt, eam magna parte rigoris sui priuant.



Reformatio doctrinae proportionum, quam Bueschius in encyclopaediae suae mathematicae appendice tradidit, sine V. Elem. libro nulla est.

Quae Clariss. Delambre in libro: *Méthodes analytiques pour la détermination d'un arc du Méridien* p. 144 dedit praecepta, arcus ex suis tangentibus, quando hae per fracturam determinantur, accurate cognoscendi, nimis generalia ideoque fallacia sunt.

In tradendo systemate scientifico regula *Ὁμογενείας*, quam methodus scholae praescribit, stricte obseruanda non est.

Methodus synthetica non semper ab vniversalibus ad particularia procedere debet, sed interdum quoque ordine inuerso progredi potest.

Perperam, vt vno et altero exemplo comprobetur assertio: ex falso posse directe elici verum, ad Theodosii Lib. I. prop. 12 et Euclidis Lib. IX. prop. 12 prouocatur.



COROLLARIA.

Demonstratio, qua Kästnerus (Elem. geometr. prop. 59) et post illum nonnulli vel recentissimorum scriptorum prop. 28 Lib. XI. Elem. munierunt, ad parallelepipeda rectangula tantum accommodata ideoque incompleta est.

Fieri potest, vt cubus ita perforetur, vt alius ipsi aequalis per foramen transeat. Sed perforatio ad Wallisii regulam (Opp. Tom. II. p. 659.) instituta successu destituitur.

Qui proportionum doctrinam e geometria proscribunt, eam magna parte rigoris sui priuant.



Reformatio doctrinae proportionum, quam Bueschius in encyclopaediae suae mathematicae appendice tradidit, sine V. Elem. libro nulla est.

Quae Clariss. Delambre in libro: *Méthodes analytiques pour la détermination d'un arc du Méridien* p. 144 dedit praecepta, arcus ex suis tangentibus, quando hae per fracturam determinantur, accurate cognoscendi, nimis generalia ideoque fallacia sunt.

In tradendo systemate scientifico regula 'Ομολογίας, quam methodus scholae praescribit, stricte obseruanda non est.

Methodus synthetica non semper ab vniversalibus ad particularia procedere debet, sed interdum quoque ordine inuerso progredi potest.

Perperam, vt vno et altero exemplo comprobetur assertio: ex falso posse directe elici verum, ad Theodosii Lib. I. prop. 12 et Euclidis Lib. IX. prop. 12 prouocatur.



THE LIBRARY
OF THE
UNIVERSITY OF ILLINOIS